

PANTIN GUERRERO UN DI E PILARNAN DI NOS BASEBALL TA CONTA



ORANJESTAD (AAN): Aki na Aruba ya pa hopi tempo caba baseball ta un parti grandi di entretenimento sano pa nos hobenan. For di chikito e mucha hombernan ta bay den equiponan di little league y mayoria ta sigui te na grandi. Nos little leagernan semper a sa di pone Aruba su number den top pa e deporte aki.

Awor te hasta hungador profesional nos tin den liganan internacional. Pero na unda y ki tempo e wegá a haci su entrada na Aruba? Den un conversacion cu sr. Panting-Guerrero, cariñosamente yama "Socio," un di e prome hungadornan di baseball na Aruba, e ta relata riba e origen di baseball na Aruba.

Segun e fanatico di baseball, esaki a cuminsa hopi trempa na Aruba. Ya for di aña 1934 a cuminsa hunga baseball, pero e interes no tabata mucho grandi. E muchanan tabata traha bala for di meya y usa palo di mondi como bate. Pero team organiza no tabata existi ainda.

Ya pa añanan 1939/40 e interes a crece ora cu LAGO a establece na Aruba. E temponan ey e Mericanonan tabata gusta baseball y tennis. E futbol no tabata mucho conoci pa nan y ta esey tabata e deporte di momento pa e arubiano.

E prome wegá internacional a tuma luga entre empleadonan di LAGO y dos team di Venezuela, di cua un di nan tabata di Maracaibo, Centauro. E wegá a tuma lugar na Lago Heights ya cu no tabata tin otro tereno pa hunga riba dje.

Despues tabata tin e yegada di trahadornan for di Republica Dominicana y esnan di isla riba cu a bin Aruba pa traha na LAGO. E grupo di Dominicano a forma un team patrocina pa Shon Dun Dun Ecury. E team a presenta su mes como La Fama, number di un cigaría Dominicano.

Pero como e wegá tin mester di dos team, un grupo di taxista y hendenan di isla riba a forma un team na San Nicolas patrocina

pa e cervéz Pabst Blue House. Constantemente e dos teamnan aki tabata tene encuentronan deportivo y e fanaticada a cuminsa crece.

Den e etapa aki ainda e wegá tabata mas bien un pasatempo y personanan manera Amable Valbuena, Raul Aparicio y Carlos Hernandez tabata busca di promove e deporte aki.

Ya pa e tempo ey otro teamnan a cuminsa lanta, manera, Botica San Lucas, Atraco (Aruba Trading Co.) y Rumbley (LAGO). E wegá a cuminsa haña su caracter, pero tereno pa hunga ainda tabata un problema. E doñonan di tereno di futbol no tabata kier a laga esnan di baseball hunga riba nan ya cu e zapato di baseballista ta coba e tereno y haci'e peligroso pa hungadornan di futbol.

E ora Poypi Lacle di Club Caribe a cay aden como tambe Mario Arends, Albertico Arends, Arturo Arends y nan a dicidi di forma nan mes un team, Lucky Strike. E team aki tabata

consisti di hungadornan: Albertico Arends, Arturo Arends, Poypi Lacle, Henry Lacle y Eddy Miller, hunto cu un grupo di Dominicano incluyendo "Socio." E team aki tabata uno mas oficial y organiza.

Na e mes un momento ey LAGO a organiza nan prome competencia grandi y tabata tin 12 team presente, tres di Venezuela Cafenol, Venezuela y Cerveceria, Botica San Nicolas, Atraco, Rumbley, Puerto Rico, Lucky Strike, Dodgers Baby Ruth y team di soldat Mericano situa na Savaneta.

E interes pa e wegá a haña un draai hopi positivo y ya por a mira cu e tabata tey pa keda. Esaki tambe tabata e tempo cu hungadornan local a haña oportunidad pa hunga na Merca. Tres di nos hungadornan a bay, Ruben Peres, Nel Harms y Josito Muyale, pero e situacion di baseball na Merca no tabata di gaba. E pago no tabata bon y hopi discriminacion. P'esey nan a bolbe bek Aruba.

Asina Aruba a cuminsa cu intercambianan deportivo cu Corsow y e wegá a sigui crece.

Den añanan '50 baseball a cuminsa haña un estructura mas oficial y teamnan internacional a cuminsa hunga mas sigui na Aruba. Segun sr. Panting-Guerrero e prome Latino cu a hunga na Merca a hunga na Aruba prome cu el a bay, esta, Juan Maritall di Santo Domingo.

Ey tambe Aruba su baseball a haña su afiliacion oficial y e prome president tabata sr. Lope Beaujon, Prome cu esey sr. Rafael Nuñez a fungi como un

presidente honorario no oficial.

Segun e experto di e deporte aki e nivel di baseball di e tempo ey tabata hopi mas haltu pa motibo cu casi tur e hungadornan tabata profesionalnan cu no a bay hunga den liga pa motibo di e pago. Den industria nan tabata mihor paga.

Sr. Panting-Guerrero a bin na Aruba na aña 1938 na edad di 25 aña y e la hunga aki te cu su 41 aña, pero e la cuminsa hunga na Santo Domingo for di e edad di 15 aña.

Den e añanan cu el a hunga na Aruba e la mira campeonato di liga Grandi di Venezuela hunga aki pa motibo cu na Venezuela tabata tin eleccion y nan no kier a stop e weganan.

Tambe e ta orguyoso di por a aporta na e deporte aki cu trecemento di cinco hungador grandi pa train e localnan, entre otro, Dalmiro Pinoz, Agapito Mayor di Cuba, Andres Julio Baez, Horacio Nuñez y Pepe Lucas.

"Socio" ta corda e fanaticada di e tempo ey, manera cu ta awe. E ta conta con un biaha un Chines a bin hunga den un team Dominicano y aki tur e chinesnan di China Club a basha bay stadion pa wak e hunga. Tambe e ta corda e día cu e Pastor, Evangelista, di Santo Domingo a pitcha contra Yubi Toppenberg y perde.

Pero Panting-Guerrero ta masha preocupa cu e situacion di baseball awor y e ta kere cu ya ta tempo pa bin un solucion.

Riba e potret nos por mira "Socio" sinta cu un foto di dje hunto cu Don Juan Peres y Nel Harms